

La'ó Hamutuk

Institutu Timor-Leste ba Monitor no Analiza Dezenvolvimentu

Rua Felicidade (Rua Cardoso Dias) Gracenfor, Bairro Central, Dili, Timor-Leste
P.O. Box 340, Dili, Timor-Leste Tel: +670-3321040 or +670-77234330 (mobile)
email: laohamutuk@gmail.com - Website: www.laohamutuk.org



23 Feveireiru 2026

KARTA ABERTA

DEFENDE DIREITUS UMANUS NO AKONTABILIDADE BA POVU MÍANMAR

La'ó Hamutuk, nudár organizasaun sosiedade sivil independente ne'ebé servisu iha área análise política pública, governasaun demokrátika no direitu umanu, hato'o karta aberta ida kona-ba diskusaun públiku relasiona ho investigasaun legal ne'ebé atualmente iha apresiasaun iha Ministériu Públiku Timor-Leste kona-ba alegasaun krime grave internasionál kontra povu iha Mianmar.

Karta ida ne'e La'ó Hamutuk hato'o pozisaun katak, justisa tenke la'o, livre husi presaan política no dignidade umana tenke sai referénsia prinsipál iha relasaun internasionál inklusivamente Timor-Leste, Mianmar, ASEAN no mundu tomak. La'ó Hamutuk enkoraja Ministériu Públiku Timor-Leste atu kontinua halo investigasaun, análise no verifikasaun legal ho independénsia plena, tuir Artigu 8.1, 9.2, 119 no 132 iha Konstituisaun Repúblika Demokrátika Timor-Leste, lei nasional no norma lei internasionál. Investigasaun kriminál nudár etapa inisial atu avalia se iha baze legal suficiente atu kontinua prosesu. Prosesu ida ne'e la'ós julgamentu judisiáriu penál no la'ós desizaun política.

Tanba ne'e, ami apela ba autoridade política hotu atu respeita separasaun poder no evita deklarasaun ne'ebé bele interpreta hanesan tentativa ba orientasaun ka limita prosesu judisiál. Hanesan organizasaun sosiedade sivil ne'ebé durante tau matan ba asunto direitu umanu no democracia, La'ó Hamutuk apresia tebes ba Myanmar Accountability Project (MAP) no Da Silva Teixeira & Associados ne'ebé regista kazu violasaun direitu umanu hasoru povu Chin iha Mianmar ba Ministériu Públiku Timor-Leste dudu prosesu legal ba akontabilidade justisa. Infelizmente violasaun direitu umanu iha Mianmar akontese iha tinan barak no sai ona preokupasaun mundiál, maibé too agora seidak iha asaun internasionál konkritu ida hodi hapara forsa rejime ditadura militar ne'ebé kontinua buras.

Estadu de Direitu no independénsia instituisaun

Konstituisaun Repúblika Demokrátika Timor-Leste garante autonomia Ministériu Públiku no independénsia Tribunál sira nudár pillar fundamentál Estadu de Direitu demokrátiku. Prinsípiu legal ida ne'e la'ós de'it nudár estrutura legal ida maibé tenke sai espasu no baze atu asegura katak aplikasaun lei ho imparcialidade, igualdade no seguransa jurídica.

Bainhira poder polítiku antisipa opiniaun públiku ne'ebé bele interpreta hanesan orientasaun ba desizaun judisiál, maske la iha intensaun direta atu influensia maibé situaun ida ne'e bele kria persepsaun interferénsia. Tanba ne'e, prudénsia iha komunikaun pública nudár parte hosi responsabilidade Política atu proteje kredibilidade Tribunál no Ministériu Públiku.

Estadu Timor-Leste rasik iha kometimentu hodi valoriza prinsipiu estadu de direitu demokrátiku, inklui hametin solidariedade internasionál ne'ebé klaru haktuir iha Artigu 10 konstituisaun RDTL hatete katak Timor-Leste sei solidáriu ba Povu hotu ne'ebé luta ba libertasaun nasional. Repúblika Demokrátika Timór-Leste fó azilu polítiku, tuir lei haruka, ba ema rai seluk sira ne'ebé persigidu tanba sira-nia luta ba libertasaun nasional no sosal, defeza ba direitus umanus, demokrasia no dame. Prinsípiu legal hirak ne'e adopta ona ho ninia baze vitória istóriu ida hasoru opresaun, ne'ebé povu Timor-Leste rasik liu ona.

Lei nasional no lei internasionál

Kódigu Penál Timor-Leste define krime kontra humanidade no krime funu nudár violasaun grave ne'ebé afeta humanidade tomak. Norma sira ne'e aliña ho padraun Lei internasionál ne'ebé bandu violénsia direitus umanus kombina Lei Internasionál Direitus Umanus (IHRL), ne'ebé proteje indíviduu sira husi abuzu estadu nian, no Lei Umanitáriu Internasionál (IHL), ne'ebé regula konfliktu armadu. Inklui Deklarasaun Universál Direitus Umanus nian (UDHR), Estatutu Roma no Konvensaun Jenebra ne'ebé manda tratamentu umanu, bandu tortura, no manda responsabilizasaun ba violasaun sira, ho obrigasaun ba estadu sira atu proteje indíviduu sira no prosesa abuzu sira. Iha tempu hanesan, direitu internasionál rekoñese prinsipiu jurisdisaun universál, ne'ebé permite Estadu atu avalia alegasaun krime grave bainhira apropriadu, atu previne impunidade. Tanba ne'e, abertura investigasaun preliminar iha prokuradór Timor-Leste nian nudár etapa legal normal atu verifika evidénsia, la'ós julgamentu ka interferénsia diplomátika.

Solidariedade ho vítima no diplomasia responsavel

La'o Hamutuk reafirma ami nia solidariedade ho povu Mianmar, liu-liu comunidade sivil ne'ebé enfrenta violasaun grave direitu umanu. Solidariedade ida ne'e la kontra soberania Estadu ruma; Solidariedade nudár aktu protesasaun dignidade umana, hanesan valor universal ne'ebé rekoñese iha lei internasionál no iha relasaun entre nasaun sira.

Tinan 50 liu ba, ditadura militar iha Jakarta viola prinsipiu internasionál no direitu umanus povu Timor nian durante okupasaun ilegál. Estadu sira husi ASEAN nonook de'it, no militar Indonézia oho no tortura Timor-oan barak. Ita labele fó lisensa ba krime kontra humanidade dala ida tan. Estadu RDTL no estadu hotu iha mundu iha obrigasaun atu uza mekanizmu legál no diplomátiku atu defende direitu umanus ba povu Birmânia.

Relasaun internasionál sustentável depende ba iha respeitu mútua ba dignidade umana no lei. Bainhira Estadu sira hatudu kompromisu ba norma universal no akontabilidade, comunidade internasionál bele desenvolve kooperasaun ne'ebé bazeia iha konfiansa, estabilidade no responsabilidade.

La'o Hamutuk enkoraja atu:

1. Ministériu Públiku kontinua halo avaliasaun independente tuir lei no evidénsia: Prosesu investigasaun presiza la'o ho autonomia no profesional, tuir prosedimentu legal no padraun prova ne'ebé aplikavel. Avaliasaun preliminar nudár etapa normal atu determina se iha baze legal suficiente atu avansa ba etapa sira tuir mai no importante atu proteje direitu vítima no direitu suspeitu ho imparcialidade.

2. Autoridade política respeita separaun poder no evita influénsia prosesu judisiál:
Deklarasaun pública presiza halo ho prudénsia atu la kria persepsaun negativa ba kazu ida. Respeitu ba iha separaun poder entre poder ezeutivu no judisiál hodi hametin konfiansa pública no proteje kredibilidade Estado de Direitu.
3. Comunidade internasionál promove protesaun sivil no solusaun pasífiku:
Kooperasaun internasionál tenke orienta ba prevene violénsia, proteje populasaun sivil no promove diálogo konstrutivu.
4. Estado RDTL no mundu tomak, inklui membru ASEAN sira, tenke defende demokrasia no direitu umanus iha Mianmar ho diplomasia no prosesu legál.

Konklusaun

Timor-Leste, nudár nasaun ne'ebé moris husi esperiénsia luta ba justisa no dignidade, iha responsabilidade moral no legal atu defende prinsipu universal direitu umanu iha relasaun internasionál. Esperiência istóriu hatudu katak pás sustentável depende iha respeitu ba lei no akontabilidade.

Justisa independente la kontra diplomasia; justisa independente mak fundasaun diplomasia kredível tanba hatudu katak Estado respeita regra no responsabilidade. Akontabilidade la'ós vingansa-akontabilidade mak mekanizmu atu garante katak violasaun grave la repete no katak sofrimentu umanu hetan rekoñesimentu no resposta tuir lei.

Ho Respeitu:



Marta da Silva



Celestino Gusmão



Charles Scheiner



Mariano Ferreira



Jonathan Gonsalves



Elia da Costa Araujo



Elivania Alves Correia